

四庫全書

集部

欽定四庫全書

儼山集卷六十八

明 陸深 撰

墓誌銘七

誥封太宜人楊母墓誌銘

楊太宜人氏蘇諱洵故無為州知州贈順天府治中靖
菴府君之配今南京太僕寺少卿陶園公亘之母也自
太安人加封太宜人自歸進士為婦為寺卿母為貢士

祖母為曾祖母為高祖母自正統丙辰生壽九十有三以嘉靖戊子閏朔考終于正寢太僕卜以明年己丑某月某日葬于某原以從靖菴府君之兆域其猶子吏部尚書偲菴公為狀以問銘於前史官松江陸深深受知太僕太宰二公間舊矣適茲道南辱廁弔客之末弗獲辭既來延平太僕走二孫公輔公載以速而太宰之命再至矣太宰之言曰旦母棄養十有一年幸吾伯母之康猶吾母也今已矣有待于子是時太僕太宰並躋稀

年二母餘哀與訓俱積且太師之昭穆也有風化焉深
又安敢以弗著按狀蘇故建安望族竹坡翁配鄒寔生
太宜人太宜人幼端慧凡女紅皆早能父母愛之初太
宜人伯兄泰娶于楊故劉夫人時時過蘇氏家劉夫人
者貞素府君之配也一見太宜人悅之即為靖菴求配
蘇亦欣然諾焉劉夫人遂脫二金釵為定天順丁丑靖
菴舉進士奉旨歸成親迎之禮既還朝選授直隸無為
州知州偕之任在任數年內助居多靖菴剛而負氣甲

申考滿北上過淮竟忤當道坐失官太宜人自無為攜家從大江間關而還還奉繼祖姑劉夫人于堂克盡婦道成化庚寅劉夫人養終靖菴始別居於所居之左壬辰乃徙居焉太宜人內總閨闈外應賓祭悉綜理之處妯娌待姊妹曲有禮意食指餘千撫御之咸當推恩衆妾視諸庶生子等於己子不但不妬而已性又好施賙窮乏助婚喪凡道路橋梁之役有聞無吝平居寬恕特嚴於教子弘治戊午靖菴卒太宜人慟絕之餘躬親終

具太僕自天府奔還舉禮以襄事靖菴嘗擬作壽藏於
太平丘矣至是太宜人忽夢與府君各乘籃輿後先詣
吉祥僧寺徘徊四顧若有所屬者既覺以語太僕亟往
訪之蓋寺後有園府君嘗與見素諸公之所遊而意樂
焉者也見素者刑部尚書莆田林公俊也中有阜隆然
起風氣鬱盤林木華茂遂輸重購以營玄堂今太宜人
之所從以歸者即其地云過太平遠矣人以為默相辛
酉大僕起復天府遇恩典受勅推封乙丑轉治中再遇

恩典封贈皆如制正德丙寅上疏移疾以便養與誥俱歸及門太宜人冠帔拜謝如禮遂命焚黃如故事明年逆瑾亂政太僕勒停于家遂即所居少南闢園池構庭榭歲時奉板輿周旋其中太宜人甚安之如是者三四載瑾既伏誅太僕得召還叙用意猶戀戀然不忍即去太宜人揣知之促之曰朝廷恩厚矣胡久不治裝耶母以予老故及今爾尚未老也翌日遂獨去壬申改南戶部郎中然念太宜人不能置乙亥夏乞休不允冬疏再

上吏部覆奏宜獎恬退詔進一階授南京太僕寺少卿
致仕歸太宜人年逾八十矣清明康強如壯時每晨起
焚香誦佛即視諸女孫習女紅飯飽時或攜諸孫遍歷
堂廡嬉遊以自適寢室外有盆花數本時抱甕灌之夜
則篝燈取故衣補綴以畀卑幼太僕每勸止之則笑曰
藉此以消夜不為勞也蓋其損已惜福者類如此嘉靖
壬午乙酉詔養老太宜人兩荷米肉綿帛之典人以為
異數安榮和豫如是者又三四載而後委順焉嗚呼高

壽懿德厚生令終宜為人瑞為家寶為太平之盛事太
宜人可以不朽已子男一即太僕亘字恒叔有德有文
娶鄒氏繼娶黃氏息女一適五經博士朱學文公十二
世孫也庶子一暄娶張氏孫男三邁鄉舉士次選次適
孫女一未行曾孫四公輔公範公載公興俱府學生曾
孫女三長適雷蓋府學生次適周臣武舉署都指揮同
知次適范宣貢士玄孫三玄孫女三其楊氏世德具載
西涯先生靖菴葵誌西涯者太師李文正公東陽也靖

菴之葬文正寔銘之茲別為之銘銘曰

既以從夫復成子逾九望百再承旨母之懿範女之士
保大相門伊其始國有忠良家孝弟前千百年後萬世
我勒銘詩職太史

良沙范先生墓誌銘

良沙先生范公卒年八十有八蓋考終云既卜葬法當
銘其子戶部員外郎韶以屬之同年友陸深其外甥朱
應辰寔為之狀按狀公諱畬字耘夫別號良沙主人姓

范氏寶應人也范故寶應著姓時為之諺曰前徐後胡
左范右朱咸以貲稱而范尤樸直大父諱宗泰父諱禮
俱被服儒術未顯也公生特秀異然多智計父以其素
羸也使治賈公弗欲強之乃就治賈賈有羸凡增鋸若
千千凡拓地若干區凡買田若干頃日豐以大人曰范
氏子賢良賈與公聞之笑曰是賈吾也凡賈有道增羨
起責轉委駟儉非纖嗇筋力則不得羸昔計然用以興
越吾試于吾家吾宗鳴夷子皮非耶夫縣官食租衣稅

而已生無益於縣官雖羸何為會歲飢公輒輸粟若干
于官例授冠帶公屬其子韶曰吾將為漢卜式耶式忠
矣而非吾志孰若顯于儒術以佐于國家是當在韶乃
專教韶韶益奮于儒術起取鄉薦公喜曰兒固當亢吾
宗矣未幾長子新病卒未幾子孺人又卒公用愀然韶
識公意弗敢去左右每歲計偕輒歸凡六往來公恚之
曰吾年且八十兒未顯尚誰待耶韶始往試天官名在
第一授禮部司務公乃悅韶竟念公每歲以便歸為公

壽辛巳今上皇帝入繼以頒詔歸某年武宗毅皇帝升
祔以頒廟號歸某年永福長公主下降以選婚歸某年
興獻皇帝上尊號則又充使歸歸輒張燕樂歡韶每侍
餐公故加一餐也韶得辭去去遷戶部員外郎階奉訓
大夫顯矣公遂病韶又以使職便歸公力疾倚門曰吾
固知兒必來也居閱月竟不起寔嘉靖七年五月廿八
日也配即刁孺人有賢行子男四長即新次翊次歆崇
府典膳次即韶女一適徐行孫男六嘉謨嘉禎嘉議嘉

祉嘉兆嘉愛議祉並縣學生孫女十二人曾孫男五人
曾孫女六卜以明年某月日啟刃孺人之墓合而大封
焉禮也公倜儻修正言行恂恂有規矩不事浮華事父
母有禮事兄有意度撫弟有惠育諸子有道父母沒執
喪禮即儒者弗過處宗族有恩與人尚義信有心計故
常裕多交名人又喜談說古今稱先王人無弗知敬重
公也歲鄉飲為大賓詔下存問長老兩賜粟帛嘗聞公
與人言歲儉豐曰旱則資舟水則資車言貨殖曰貴出

如糞土賤取如金玉言農畝曰欲長錢取下穀長斗石
取上種皆善名理即儒者亦弗能過也深家故江南逮
壯北遊取道淮揚必式公廬且韶又兄弟行也以耳目
所睹記若此槩於朱君之言皆核可登載自惟以罪斥
過公門而不敢入哭得南郡遠又弗克會葬而言又無
徵重辱韶也咸可流涕云乃追為之銘納諸玄堂銘曰
同理異用觀厥會通君子之風彼蓄此施其出不窮君
子之功吁嗟乎范公森森良沙匪為若封異姓同宮過

者必式于邑之東

勅封徵仕郎刑科給事中龐公墓誌銘

丹菴先生姓龐氏諱能字大寬澤州大陽南里人也以子浩叅議貴章服第四品大夫徵仕郎刑科給事中其實封也公資貌魁偉朴野慈良語言琅然然必依於孝弟忠信乃已故未嘗與人忿爭家嘗累百金仲兄欲專之雖一毫不敢與也事仲兄甚恭時或遭撻辱罔弗敢順嘗若恐傷其意者鄉人至于今稱之成化中山西大

饑人至相食大母王卒經紀喪葬甚力諸兄時適行賈食
指頗衆皆賴公以濟正德中歲又祿鄉人逋負積數百
金悉焚其券大抵公以勤儉起家而以陰德積行將古
所謂仁義人耶至老不入公府嘗舉為鄉飲大賓云享
年八十有二以嘉靖八年己丑十二月廿日考終於正
寢少叅君自浙藩奔喪深適聞晉臬之命過於大江之
南弔且哭焉既而請銘其藏按龐公於澤故家也七世
祖資資生淵淵生沛沛生濟安濟安生宏公之曾祖也

宏字彥隆洪武丙子鄉舉歷臨漳新安狄道安仁四學
訓導博通五經贈工部主事曾祖母趙氏封太安人祖
諱毅字克勤永樂丁酉鄉舉仕至兵部職方郎中祖母
陳氏袁氏俱安人考諱聰字至明妣王氏實生公配牛
孺人以賢稱子男三長即浩娶顏氏宦業駸駸有聲實
次澤娶王氏又次沐娶劉氏息女三長適縣學生趙伯
貴次適牛宿次適李時修孫男四曰敦曰敷曰教曰敕
孫女四以某年月日葬某山之原是宜銘銘曰

委蛻而遷誰則不然況也令問亦有高年厥所難者其
後允賢服哉雖束絲綸載宣既順既安亦榮亦全過而
必式鬱鬱高阡於萬千祀左岡右泉視我銘詩以考承
傳

王母劉孺人墓誌銘

嘉靖七年春二月十有七日王母劉孺人卒於松江之
郡齋孺人安福王先生木軒諱秩之配也孺人有子曰
學孔學孔舉進士授推官于松孺人之所為來也蓋就

養云初孺人至自安福是時順德何公子魚守松以推官之廉慎佐已也乃迎拜孺人于堂下退而喜謂諸僚曰此真魯卿母也及是卒公親為之衾殮如禮灑之泣曰魯卿之母猶吾母也已復雪涕為狀以告于陸深使為之銘深前為國子司業時識魯卿于館下器之及孺人之來松也復為魯卿為孺人壽且祝將以終惠吾松也奈何遽至是耶深適赴召道松哭之魯卿迎拜且泣且前又再拜曰學孔不天茲將奉柩歸以某年月日合

木軒府君之穴惟吾母不朽之圖敢以請乃受狀為之誌曰孺人姓劉氏出櫟岡鉅族父公獻隱德弗耀母鄧氏寔生孺人幼有異質長益修女德父母鍾愛之曰必配良士年十九歸木軒公族人以為稱既歸克盡婦道事舅姑孝敬備至家政巨細悉入綜理舅姑亟稱之曰得此元婦家之福也木軒苦學孺人躬織布為助計日三必成匹百費皆從中辦故木軒得一意於學遂有重名于時為學者所宗師有兩子課之亢宗會仲業成而

天木軒歎曰豈天不欲相王氏耶孺人抱魯卿于旁曰
是尚在造物者固有待也復何憂既而木軒下世家遂
中落孺人益勤苦為王氏門戶計賴以不墜嘗泣謂二
子曰汝復何望耶魯卿益勵于學或有外侮至抗聲曰
爾謂孤兒寡婦易欺乎天道好還請試思之聞者愧伏
會魯卿領正德丙子鄉薦登癸未進士孺人喜曰季子
成名矣則又泣曰恨汝父之不及見也至松每見魯卿
公退必問獄訟幾何何狀輒戒之曰務刻深文非王氏

家法吾不願聞有此子孫也及見魯卿橐中蕭然常祿
之入不暇給則又喜曰吾行時族人謂吾富貴矣今日
所見殊不逮吾始知吾子之能廉也在松未幾每西望
曰吾西日耳旦夕未可知也寧汝累耶行且歸矣愛民
為國須好為之所以報老身也煦煦為母子得無細節
乎先一月魯卿以公事過蘇母子別時笑言欣然無
恙也歸信宿而變作享年七十有八以天順辛未五月
十二日生云子男三長學閔娶李氏繼劉氏次學昌娶

彭氏次學孔即魯卿也娶劉氏女二長適彭育次適郭
某孫男二長世祿次世官孫女二嗚呼孺人出自名族
歸于故家其所聞見要之固有出凡異常者獨其茹辛
崇素以為王氏衍長文獻之傳甲科聯武若今太僕少
卿學夔進士學舜皆自孺人焉成之勤儉之風至老不
衰則於王氏可謂有百世功矣善乎太守何公之論曰
孺人蓋有丈夫所不逮魯卿政績丕顯而華要伊邇則
孺人之所以報食于天者固大受而遲發之耶是宜銘

銘曰

其來也歸如其全以歸也寄如其賢子而母也以屹如
奠如

陳母嚴孺人合葬墓誌銘

陳孺人嚴氏以嘉靖元年壬午六月五日考終於里第
越四年乙酉正月朔日庚申啟南疇陳公之窀而合焉
先是太學生文禎祈得一官為孺人榮謁選天曹自京
師聞訃哀慟匍匐走四千里還卒哭慘怛感動一鄉人

及是葬有日矣綰經奉中翰王君世美之狀問銘於陸
深按狀海邑著姓稱嚴陳家世聲望故等夷也陳松巖
翁諱衡嚴怡蘭翁諱復又交好也松巖有子曰泰即南
疇公公幼偉奇卓卓能自樹立怡蘭見之曰吾有女真
若配也遂締姻焉及笄歸南疇公已不及事松巖

闕

夫人備盡孝養及南疇蚤世事夫人益謹夫人每呼
之曰賢婦賢婦能使吾老忘吾兒也怡蘭無子孺人自
陳奉養之無闕事怡蘭以高壽終孺人與之訣曰吾父

無慮嚴氏之不食也即吾有子孫矣怡蘭曰果然吾瞑
矣故今陳氏祠嚴氏云成化丁未歲饑有賑貸之令孺
人慫恿南疇輸粟數百石應格自舉文禎後嘗從容謂
南疇曰自度吾再有難矣如君後嗣何乃為置側室詹
氏有子曰文祥陳數世皆單傳至是始繁人尤以此賢
之享年七十有二以正統辛未二月三十日生云子男
二長即文禎勵行績學娶王氏東溪少參長女次即文
祥以義授官千戶娶顧氏息女一嫁梅萱孫男六璵玠

理珽琮玘孺人仁慈有禮勤勞于陳甚大教訓子孫動有矩範日給裕而機杼之工至老不哀歲時享祀未嘗不潸然下涕也蓋其天常之厚如此梅氏甥嫁予家予故知之尤悉宜銘銘曰

陳之大嚴之功下從其夫以壽終陸溪之南氣龍蔥後千萬年胤嗣無窮徵我銘詩其由衷

處士思嚴唐君墓誌銘

嗚呼此吾思嚴唐君之墓君諱啟字世明世家上海南


京後軍都督府都事桂巖府君之仲子都察院右副都御史拙菴府君之孫也祖妣尹氏封恭人妣余氏封孺人君生而秀穎工進士業屢試場屋不遂而後棄去性至孝兄兄弟弟親親賢賢各遵典憲余孺人素羸疾君事之每飲食必謹孺人每飲食君必樂也都事公遊宦兩都君自家經理資給惟力南都之訃至君徒跣千里扶以歸喪葬如禮與人交不為畦町開口論事峭直無面背人以此服之其於人情物態多所曉練卓有不羣

之志年四十七以正德十六年十月二十四日病下滯而卒卒之日人愈哀之娶梅氏邑之舊族賢而能家與君相敬友終身未有子也為置媵妾以俟君每歎曰吾中丞公清白忠諒有功在國家將誰食之報耶吾都事公猶未融也吾兄千兵公世昌唐之世嫡也而德厚卜其一孫屬之梅曰母之且祝之曰庶以承吾志也遂名之曰承宗承宗長而就學娶倪氏左右孝養君甚安之及是葬有期矣乃手自為狀哀經匍匐泣且告曰歲在

未月在丑辰值壬寅原在某溪謹奉以襄事焉敢以銘
請深不覺失聲以慟吾思巖君之重不幸也每憶少時
與君同壻于悅清先生之門歲時往來聯鑣共載翩翩
兄弟也同處庠校以文字交好甚密中間離合出處之
際期勉規誨者多矣方將恃君以老而不虞君之遽至
於此也俯仰今昔竟何心哉竟何心哉為之銘曰

桂茁蘭芽發不長珠沈璧隕竟誰傷傷哉行裕弗可常
緣情起義後必昌粵有不朽垂耿光得羨為彭喟為殤

孔悼回學今則亡黃生不祿鄙吝萌為仁為壽孰主張
一氣茫茫繫彼蒼吁嗟思巖其永藏



儼山集卷六十八

欽定四庫全書

集部

儼山集卷

六十九至
七十二

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

儼山集卷六十九

明 陸深 撰

墓誌銘八

勅封太安人趙氏墓誌銘

唐母趙太安人考終於上海之里第時嘉靖丁酉十一月廿有三日正統丁卯閏七月廿有三日享年九十有一江西提學副使錦之母也太安人以副使君貴

受勅蓋刑部郎中時推恩云副使君太安人季子也諸
子惟副使君侍敝舍棺衾咸躬親惟謹人以為副使君
寔亢唐宗而太安人成副使君之賢寔有功於唐卒食
其報天道何如也深之女弟歸副使君逮事太安人習
聞太安人之風久中書舍人鑒與共事館閣每泣向深
曰太母之歿非舅孰宜銘且父命也今葬有期乃奉副
使君所自為狀以請至勤深不容辭按狀安人之父曰
趙怡閒翁母潘氏皆儒家世居上海之南浦怡閒翁開

門授徒以師道尊一鄉無子晚舉安人與潘孺人鍾愛之安人自幼陶染詩禮動合經訓不但工女紅已也既笄歸封刑部郎中質菴府君以慈惠溫淑稱府君前室有子曰銳曰銑側室子曰鎰及二女安人子之逾於已子皆成美才子若女亦德之如所生質菴府君事封衢州知府容軒府君甚孝安人每先意承之奉養備至容軒翁春秋高遘疾危甚醫禱弗效質菴偕安人不離在右疾既革乃跪泣榻前翁舉手撫之曰汝夫婦孝誠篤

至願生子孫如是如是時安人適娠復向安人語之曰
吾此去當懇諸冥官乞一賢子畀汝逾月而副使果生
質菴好客賓朋常滿座講經考史鳴琴賦詩日以為樂
鮮入內室故內政悉安人主之媵妾童僕上下罔不得
其歡心平生不好積聚恒曰積財乃積惡耳故自日用
外輒以施人貧乏來告者必委曲賙貸之雖給者負者
相繼咸弗較曰彼不得已固當聞有建橋梁甃道路者
輒傾囊助之弗靳蓋其性然也弘治乙卯副使舉鄉試

明年登進士第安人自家以五經漢唐諸書寄京邸囑之曰汝少年登科聞見未廣公餘宜從事於此為報效之地毋徒從朋儕日遊燕為也出知東明復以脯醢鮓鮓遺之曰以此佐汝滋味汝第飲官中水可也既為給事中安人色喜曰此官必廉能得之已而為逆閹仇陷去判深州或來慰之則又曰士大夫當保名節官資去來寄寓等爾正德壬申質菴棄世副使以刑部員外郎守制還既禪除欲乞侍養安人微知之遂命長子鎬赴

銓錞時盛文名乃授浙江布政司都事援例歸養安人
曰汝兄歸汝宜行以報國也始還朝遂轉郎中丙子奉
勅審錄湖廣竣事多平反冤獄安人復喜曰刑官當如
是尋遷江西按察司副使提督學校俄為逆藩誣誤罷
歸安人曰是非命耶時安人年七十餘矣日惟焚香淪
茗集諸孫婦女講說閨房儀範或談善惡報應之事以
自娛至於服飾華麗不好也居常布素至浣濯不忍棄
間見侈麗輒戒之曰人當積福苟暴殄天物有神罰矣

字紙偶墮地者亟俯拾水火之曰此聖人所製寧可污
賤耶其謹厚仁敬多類此年過八十猶聰明不衰惟齒
則盡脫予女弟躬視諸饌咸手成淖糜每為陸氏婦加
一殮又數年得痺疾歲輒發發輒殆副使君延致名醫
時以善藥扶養元氣少愈嗣後每月發治如前久之迺
月三四發即治不復效矣遂不復起而始終可無憾也
惟安人毓德於豐亨之世言歸於閭閻之家安享富盛
逾九望百而子孫滿前金紫在側歲時稱觴為壽則手

撫曾玄常百十人翟冠霞帔高堂中坐望之如神人而
懿德仁風内外人飲之不能盡大江以南賢母未之或先
也其子女盈十半出安人長銳工部司務取山氏次銑
娶杜氏次鎰娶陸氏鎔即都事娶余氏俱先卒錦娶陸氏
封恭人千戶李榮士族周遲顧源清盛珊陳熊其婿也孫
男十六人長敷次徽次徹次文太學生次微亦俱先卒
次攷太學生次即鑒中書舍人內閣誥勅房辦事次稷
鄉貢進士次致次啟亦卒次敏又次交燮爛贊袞皆太

學生孫女十四曾孫男二十五人玄孫十人深與憲副
有兄弟之誼視母猶母也顧旅食京華徒以空文為役
嗚呼尚忍言哉葬之日卜以己亥歲之仲冬三日啟刑
部府君之壙而封焉銘曰

厥家之興緣起以婦惟子之賢寔視其母孰克兼之世
則鮮有嗟嗟安人取之左右人亦有言惟德不朽闕睢
閔宮風猷迺久嗟嗟安人式啟唐胄既惠既慈亦創亦
守鸞封自天翬翟在首百歲何遲同穴惟友慶澤之餘

以豐厥後太史銘之泉深土厚

黃良式妻陳氏權厝誌銘

太學生黃標之妻陳氏賢而客死死又無年三男二女纍纍然逆旅也標將扶櫬歸攢而問銘於予標予姊子也自幼從予問學人稱曰陸家宅相予愛之往歲戊子予赴內召攜家入都時標亦以家從梅淑人甚愛憐陳氏婦數稱其賢嘗謂予黃氏甥落落有奇氣輒不便委曲而陳氏婦低昂應之為能成吾黃氏姑之志也予

在成均淑人多病陳氏婦數來視如所生然既予南遷
黃甥陳婦復跋涉從之去國丁酉歲予召自蜀藩明年
標自故鄉來卒業太學陳氏婦再從之行又明年乃以
疾卒於崇文門東之寓舍年三十有九實嘉靖己亥十
有八年四月晦日也予方自扈從還揮涕哭之曰天乎
天乎何奪吾甥之賢婦之遽也標為書三千餘言以狀
其遺行予屢讀之不能終一篇乃撮其大者以叙之叙
曰陳婦諱香父金邑庠生母沈氏嘉定東鄉之采桃港

北人也黃陳皆蘇故大家相距百餘里竹泉先生為標
擇配凡閱數十家閱陳女賢好以龜卜于家祠龜不焯
而兆兆又吉遂納幣焉會標出繼大宗事所後母俞孺
人竹泉則相之成婚及期父母醮之曰兩姑之間難為
婦兒勉之逮事俞孺人極其誠敬時俞孺人寡居齋蔬
灰心歸依釋教常悶悶既而憮然曰早知有新婦若是
安用自苦為壬午歲竹泉先生暨吾姊孺人卽大母孺
人俞孺人相繼四喪家蠱紛紛起陳婦贊標内外事帖

然時病痘而產理家務無少懈怠已丑歸自京師每慰
標曰此行甚勞畏而君之志識殊進矣標首肯再四壬
辰六月以母沈孺人構病急掣小舟江行中暑幾危坐
是遂病會重入都而醫藥不能效矣既屬續猶以好言
慰標曰兒女事有君在當再世為夫婦矣標發其行篋
才有故衣三襲遂用以斂而標哭之極其哀云標又哭
向予曰吾婦貞淑勤儉出自天性其初入予室也妯娌
姑姊妹或相陵侮受之若騃既就枕簀間簌簌有淚聲

疑而問之輒對曰偶然念吾父母耳標少躁急當事有動聲色者畧不校徐俟氣平曰君怒解耶若此數數標每愧而改焉標事夜坐臨文讀書或處分人事每至宵分必以女工佐之未嘗先寢有時親友紛集或客從遠來琴奕觴詠連留浹旬日從中治具甚辦親疎等數秩如至撫兒女必加嚴標少假借之乃曰惜兒害兒也一錢尺帛必留俟標用嘗曰婦人私蓄即皆夫財耳出入之際人亦能挾之吾斷不為也會歲歉適場禾被毀家

繫食指不給乃日織布一疋晨令市米又不給至稱貸
又不給或盡脫簪珥標念之後豐稔償以數十金又不
願為粉飾費曰是可買田宅遺諸兒也嗣後服用皆淡
素有一青布幃施卧榻不易者十九年其賢多此類予
益不忍聞遽視標曰止止長子光次炎次熒女二人乃
為之銘銘曰

孰啟之賢而弗永其年孰傳若賢汝夫則然子以母賢
而嗣息繇繇身後身前定者彼天聊用掘泉盍虛左以

遲兮歸全

廣濟教諭周先生配朱孺人墓誌銘

孺人姓朱氏諱某湖廣廣濟教諭南池周先生之配太醫院冠帶醫士同之母長洲耆儒東山先生之長女也東山翁以師道重吳中故孺人通孝經小學大義攻女紅復攻筆札能楷書翁鍾愛之自諸生中識南池曰是可妻也既歸南池南池為郡弟子員每試必在首選文章名籍籍起時世家大族爭禮致為塾師歲留客館時

訥菴府君盧孺人具慶在堂每去輒囑之曰吾父吾母
得卿侍頗勝吾養也辛酉秋鄉試下第歸盧孺人遘疾
南池亦因以疾孺人竭力醫禱會盧孺人卒喪葬事殷
家遂中落然事訥菴公甘脆未嘗不具優游以至七十
有六乃終人以為難云南池凡八舉於鄉至己丑始以
貢選於廷授開化縣學訓導孺人從之九載叙陞廣濟
教諭在廣濟遂以疾挾幼子園東歸至小姑山卒寔嘉
靖戊戌之十一月十七日也距其所生成化丁酉之五

月十五日年六十有二云子男三長即同娶盛氏繼徐氏以精通醫術選視慈慶宮官匠次冊吳學生娶陳氏次即圓贅胡氏女二呂恩葛藟其壻也孫男四父入學覺孫女二卜以嘉靖己亥十月初六日葬于胡搭村祖塋之次予比還朝善病數飲同藥德之同固文雅往來久始知其學有所自而孺人之賢可書者又每若此遂按給事顧君狀而銘之銘曰

其生也五湖之陰其沒也九江之潯天一毓靈與大化

兮浮沈賢婦慈母尚有光于古今

碧溪先生孫公墓誌銘

公諱鵬字朝序號碧溪姓孫氏孫之上世蓋在前宋靖
紹之間來遷上海黃浦之南因姓其地至今曰孫家灣
云高祖諱昌高祖妣王氏曾祖諱善曾祖妣唐氏祖諱
怡字某別號節軒賓州學正祖妣張氏考諱寅別號愛
溪義授散官妣張氏生二子長鶚字朝立號黃溪仕為
刑部司務卒於官次即公也初愛溪府君之才兩子而

愛之也以官業付黃溪以家業付碧溪故各有立而上
海之孫氏益以大黃溪領鄉薦公每周旋兩都間會愛
溪府君病風公侍疾特敬謹疾尋愈既卒哀禮兼至迎
張孺人于新居孝養具備孺人卒公哭之哀曰昔我迎
母圖報也苟私所遺為利也悉以供窆葬之費黃溪之
柩至自北都公號涕奔迎尤竭心力嘉靖壬午子繼祿
領鄉薦捷至公喜且泣曰吾自辛亥之歲受誣鄉惡幾
不能家明年妻亡旋已無室吾兒才八齡耳與兄妹零

丁攜負人所不堪姑忍死植立課之讀書僅僅足自慰
辛巳之歲長子繼爵又折吾門書香無復望矣兒幸成
名豈天之報我耶乃撙括租利一切蠲之每事愈從寬
簡鄉人以為惠既乃築室當市區規制楚楚有祠有堂
有樓有寢悉比於禮義徐內翰少湖有文記之別築涵
虛亭于宅西吟嘯觴詠時閱古書其中儼然身在圖畫
居嘗誨繼祿等曰族人體異而派同者也臧獲分殊而
理一者也天若玉汝于成當立義戶以覆宗黨使無賴

者均有所庇築義塚以掩齒骼使無後者得有所歸此
吾志也汝等識之繼祿奉斯言以請銘于深深聞而歎
曰此盛德事嗚呼如公之志安得盡白於天下也深少
與黃溪先生同學為進士業或時宿食其家公必從旁
具殽羞撰筆硯咸精潔有條緒每戲作長者語慰之曰
此今日之佳子弟乃異日之賢父兄也顧黃溪相與一
笑公亦鼓掌若和答然宛宛如昨日事而遽銘公之墓
耶黃溪之葬深實銘之數載間人事果何如也公年僅

五十有五以丙申八月九日生以庚寅八月十日卒茲
卜以癸巳某月某日葬于薔薇涇祖塋之穆以合于張
孺人之藏張出舊族孺人有賢行繼配許氏能相子男
五長繼爵縣學生配朱氏俱蚤世次即繼祿有文行名
將起甲科娶胡氏張出次繼孝聘喬氏次繼儉聘陳氏
又次繼英許出孫女二惟公孝弟天厚綜理才周善能
以不足累致有餘故其起槩興衰之業視人人特易至
於安恬好禮不嗜勢利與人交克已而信議論無阿有

不合理者輒面折之尤人人所難云嗚呼如公之才安得盡用於天下也宜銘銘曰

既起其家亦成其子前千百年曰此嗣美後千百年自此而始吁嗟碧溪不朽在此

唐母梅孺人墓誌銘

予友思巖唐君世明既卒之十有八年其配梅孺人卒孺人予室淑人之女兄也吾海邑唐以顯達梅以故舊兩家並著姓而先世又同鄰閭烏溪之上督府都事桂

巖公為仲子擇配以告于都憲簡菴公公喜曰此殆天合也孺人既歸思巖君君讀書好義有直聲學進士業成累舉京闈不第寔孺人以勤儉孝敬佐之一族稱賢然不能有娠屢為思巖置妾媵以好言溫色御之竟亦不育遂無子以承宗為之子孺人中歲病乳癰久之甚苦承宗畢力醫治之少愈復作作復愈戊戌歲疾作如初承宗忽夢具禮服走京師向予拜乞文字偃僂望見予館几上樹金書牌額作闕字醒而恠之曰此何祥也

疑之而孺人竟以八月七日終于病癰及承宗緘書問
銘適予上疏乞歸田蒙上勉留詣闕謝唐生絳從旁道
其詳如此絳承宗之母弟也予始發書歎曰此豈有默
定者耶孺人諱某考悅清先生諱元妣張氏孺人少負
淑質事父母昆弟克盡其道歸于唐迨事都憲公公清
白歷四朝無厚遺都事公宦遊南都尤為淡泊孺人安
之惟蚤莫勤勞以取給奉姑余孺人于家更為委曲余
孺人素羸疾湯藥飲食不敢輒委諸人人會都事公訃

自南都還孺人相思巖力營祭葬居常治家咸井井如
禮賓客姻親無少失門戶日以豐潤既孀居恒處一室
以節自苦疾既革亟呼承宗語之曰兒固唐氏一脉吾
育之胎孩中黽勉作人毋墜祖業吾無子而有子矣此
汝父之心也言訖而逝上距所生成化癸巳之正月十
日享年六十有六云一子即承宗為邑庠生文翰方有
聲娶倪氏孫男三杜槐桂孫女三長適陸文禧餘未行
茲卜以某年某月某日啟思巖之葬而合焉為之銘銘

曰

壽不以年嗣不以身傳同歸及泉而世乃並賢藏焉息焉於萬斯年

儼山集卷六十九

欽定四庫全書

儼山集卷七十

明 陸深 撰

墓誌銘九

誥封太恭人顧氏墓誌銘

徐太恭人顧氏以子洗馬階貴封寔贈中順大夫江西按察司副使思復府君諱黼之繼室也以嘉靖十九年庚子六月朔卒於華亭之里第饗年六十有八云巳亥

歲今上皇帝建儲宮妙選中外直諒名實之臣克賓寮
時階奉璽書提督學校自江西召為司經局洗馬兼翰
林院侍讀仍以四品階秩供職是秋北上太恭人送之
郊亭命之曰聖天子錄汝于罪戾之餘躡處清華汝但
盡心事事老身幸能飲食毋我念也今年春再遣季子
陟學于洗馬牽其衣曰為語汝兄汝姊善事我幸無恙
已乃撫其背曰汝好取科第汝兄儻亦轉遷年時歸為
捧一觴正我七十壽爾及階自長安聞訃與陟相對舉

其辭哭甚慟則又哭曰母報已矣君恩咫尺可覲也即具疏以情事請上特允之賜祭賜葬蓋殊典云既乃奉太史趙君景仁之狀問銘于深按狀太恭人系出浙之鄞以有戎籍于松江所故今為華亭人父振宗母駱氏太恭人生有異稟謬以星家言其不宜子遂不欲嫁行年三十始歸思復府君府君已再娶曰吾有子若女矣術言果然然亦何傷吾聞難嫁女必賢庶以母子女也是時府君承宣平初娶于林生子曰隆生女嫁葉蕙繼

娶于錢生一女嫁趙輔太恭人入室果能視前產如已
生府君又有側室遺女亦育而嫁之蔣乾猶子六人復
撫視之無間府君自宣平移丞寧都皆迎母就養太恭
人奉姑惟謹丞時出署他縣或奉檄理公務別所十九
在外太恭人孝養姑愈謹又躬自紡紉以助丞廉是生
洗馬次生一女次生陳次生陟而術家之言窮矣鄉人
多以為美談洗馬風猷凝遠為諸生時已脫穎衆中有
天下之志府君目存焉因母喪自免不復遊宦家具益

落太恭人佐以儉勤至脫簪珥殆盡府君充然若不知也嘉靖癸未洗馬進士及第明年府君考終以編修守制還人以私干者太恭人率從中沮止之蓋不欲以家累貽其子云既終制還朝以編修論輔臣建革非便謫為延平推官稍遷為同知為僉事為副使太恭人咸裕如也先是府君有妹歸姚氏者寡太恭人亦有姚氏寡姊皆老而貧太恭人胥迎歸與共寢處衣食之甚恭二媼謝再四太恭人慰之曰吾見吾姑如見吾夫吾見吾

姊如見吾母爾石氏如暴卒太恭人有美材壽器即輒
與之其仁厚類如此他如訓愛內外子姪各有成立族
人待以舉火者尤衆蓋徐氏之賢母云以成化癸巳十
二月三日生茲將以卒之年十月二十七日祔思復府
君蔣涇之阡子男四長隆娶何氏次即階娶沈氏繼娶
張氏次陳早卒次即陟娶宋氏國子生女四嫁施文治
者為已出蓋奉以終養者云孫男四曰琛曰璠曰球曰
環環以後陳孫女三嗚呼女德繫人家世大矣諺稱蘆

花絮事託諸大賢而鶴燕之夢寔兆宰輔信然則太
恭人完養厚畜殆天相之以昌徐宗洗馬君之所為發
祥而託始者夫豈偶然也哉是宜銘銘曰

大器兮小官貞女兮嫁晚二美兮匹難天作之合兮澤
遠蔚斯丘兮且吉完視我銘詩兮琰琬

太安人王氏合葬墓誌銘

皇明正德初有死忠之臣曰禮科給事中郤公夔字舜
臣嘉靖初今上特賜褒旌事具黃太史碑表中太安人

即公配也姓王氏父諱政平定守禦所正千戶母嚴氏
太安人生有異兆簡默沉靜及笄歸公以儉勤佐公登
科第官京朝公既死事邊鎮太安人攜長幼累累西歸
忍死竭力以經紀鄰氏之家理荒修廢凡三年而始定
又數年而畧備于時長子元深始仕為壽州守仲子元
洪始舉進士屬官司徒旋改御史得授勅進封中外迎
養太安人若少慰然既而元深歸自壽元洪歸自秦乃
率二季清澈左右承顏太安人益歡戊戌之春手自移

菊顧而歎曰萌芽既生本根就腐物理則然人可知矣
起去如不樂遂感疾以嘉靖十九年庚子十一月七日
卒於正寢享年七十有九四子二女孫男八人孫女九
人卜以明年二月二十日啟給事公之藏而合焉禮也
元深手自為狀遣弟元溟走京師問銘予昔有事於晉
陽識壽守文淵又自秦入蜀識少參文範復憶往年初
登朝時逮見給事公誼不容辭嗚呼忠義事關祚運而
感應必至者天也我朝養士有禮至於孝廟盛極矣是

故給事之節以報國也太安人之造鄰以報公也子孫多賢以報太安人也豈非天哉豈非天哉法應銘銘曰國有忠臣室有貞婦家有慈母於人乎何負是曰不朽合而封之昌厥後

中憲大夫湖廣提刑按察司副使張公墓誌銘
我孝宗敬皇帝臨御十有八年養成忠正直諒之風士大夫不以言為諱以不酬所言為恥凡臺諫必極天下之選布列有位蓋肅如也于時張御史鳴鳳則在南臺

武廟初權姦擅政鳴鳳等咸切諫有中旨下詔獄械逮
至京集于闕下杖斃人三十凡若干人而上海實有二
人焉曹御史閔與御史鳴鳳是也已皆重創幾死皆幸
不死民之深時出候才相顧涕泣而已庚午秋逆瑾伏
誅有詔叙復稍遷湖廣按察司僉事尋陞副使以父喪
解任服闋仍補湖廣今上皇帝既自興邸起適公以繼
母之喪還遂有寶鑑綵幣之賜者再蓋宜有受知焉而
公已不及矣嗚呼公之於時也抑亦遇而不遇者非與

嘉靖元年三月二十二日卒於苦次享年五十有八深
方在疚聞而悲焉卜以明年十二月六日壬寅葬于龍
華祖塋之次其孤寶仁等奉遺言以墓石見託哀經走
百里拜且泣曰先君之棺已蓋矣世果有定論耶定未
定惟執事戟手曰此先君志也言已又泣深慰且辭焉
則又泣深知公淺嘗聞徐參政讚道公吏永康精甚已
卯庚辰之際京師見前文選萬少卿鏜稱公有治才都
給事中邢君寰謂湖湘之政公為最蓋當是時已有飛

語聞于朝然坐是竟白諸君以深鄉人也質之然不謂公止於是也已乃按狀狀出金華推府張公世和世和名鳴鸞公之兄也當有據乃誌之誌曰公姓張氏諱鳴鳳字世祥上海人也別號梧岡子狀稱張之先出南軒後自汴扈從而南因家上海有諱楷之仕元至提舉楷之生海運萬戶達之達之生詢詢仕我朝至貴溪知縣貴溪生海寧教諭復古教諭生雲林隱君述雲林生紹字宗道別號晚節冠帶監生贈刑部主事公之祖也刑

部生應天府丞諱黼字仕欽別號養恬丁未進士配尹氏贈安人寔生公公生未浹旬而尹安人卒鞠於大母以成少穎敏與世和同領應天乙卯鄉薦登丙辰進士知永康自永康召為南京山東道監察御史巡歷江上下咸用安濟再赴湖廣時會使闕二年皆公署掌憲體明慎按撫諸公交薦章六七上四川巡撫都御史胡公世寧特疏其有撫綏御衆之才云武義有殺人獄久弗決當道自永康檄公治之夜夢緋衣語之曰得王十一

乃了願明物色其人獄遂成人咸神之公之器幹多類
此惜哉竟止於是也嗚呼初府丞公以公貴進階亞中
大夫母尹氏加贈恭人繼母瞿氏亦封恭人公事瞿務
得其歡心撫弟有恩曰母忤吾母也娶余氏封孺人稱
善相子男五長寶仁娶葉氏次寶忠娶沈氏次寶訓娶
朱氏次寶賢又次寶臣側室林氏出也女二長適錢萬
選次未行孫男二孫女五嗚呼愛憎毀譽之情善惡是
非之故同行而異理古人所以有毫釐千里之歎也惟

臺諫執其公惟鄉邦存乎實公於權則必行近於實則必信此世所以大同孔子曰斯民也三代之所以直道而行也深於誌公重有感焉乃銘之銘曰

孔云必達在家在邦捐軀赴國世亦少雙孝弟之言罔間內外目覩龍飛事豈有待待不以年拊髀懷賢古今所歎秉彝則然千載萬載惟公惟德有考厥終視此銘石

將仕郎景寧簿雪莊韓公墓誌銘

公姓韓諱綸字縉之別號雪莊上海人也韓於上海為
舊族至公始以文學登進初居黃浦之東華漕漣之上
有諱福四者生盛盛生允恭允恭生彥英彥英生呈呈
生十男子長諱永常號槐隱槐隱始拓市居謹愿長厚
修髯白皙如畫以輸粟授品官衣冠偉如也槐隱寔生
公母張孺人公少有大志為邑弟子員有聲成化丁未
例貢入國學卒業家居時槐隱年高家族豐衍命諸子
各理家政廼就公養養克以志頃之槐隱公張孺人相

繼謝世公喪葬盡禮廬居墓側因名雪莊遂以自號士大夫題風木遐思卷表之正德丙寅謁選天官授浙之處州景寧縣主簿景寧山縣也險瘠而民獷因礦而盜公捕其尤者論法餘撫諭之皆貼服為良故多虎患公設法以弭之縣每闕尹即公署篆以廉勤聞時鄰縣有殺人獄三人悉論死處守梁公檄公鞠之公立釋其二曰法抵死者一人耳處屬十縣多宿逋御史按者委公辦理甚嚴公歎曰是徒驅窮餓於溝壑無益也曷若俟

秋成帶而徵之乃具申白會有詔蠲馬幾滿兩考諸當
道並皆獎勞偶以濕疾懇請而還民甚思之既還再營
雪莊以居稍稍構亭榭闢園圃植竹種菊與鄉士夫結
晚香之社觴詠為樂優游其間幾二十年以嘉靖丙戌
十月二十日卒享年六十有九配談孺人諱原靜同里
望族明慧孝敬及笄歸公閨門穆如也治家種種有條
緒尤以勤儉慈惠不妬聞從公於景寧內助為多及歸
道嘉興以正德辛未五月念八日卒享年五十有二茲

卜以某月某日合葬於趙溪先塋之次惟公出饒裕之家際豐亨之運仕宦雖不甚顯非苟碌碌而尤以早退為賢平生謹畏重信義繼室費晚舉一子甚愛之憫其弟維之無後也即命為繼教子孫皆有法韓宗益大公可無憾矣子男一恕娶顧氏知浙江都司印倜儻有文女三長適縣學生余繼瑞次適山岳次許嫁趙希忭費氏出也孫三蓋臣國子生次鼎臣次俞臣子時將為延平之役蓋臣具狀以請希仁送予至武林要予為銘銘曰

仕以達云達豈盡仕一命苟共是曰致理嗟嗟雪莊况也履止有淑者媛以續以似同穴而歸茲謂不死阡原鬱鬱載蕃後祉

勅封承德郎南京祠祭主事趙公墓誌銘

公諱山字天秀姓趙氏曾祖諱鑑祖諱瑜考諱清妣施氏上海人也公少孤長而玉立豐頤秀幹有治才能振起其家義授散官衣冠峻整一時上官往往器之郡邑有大役輒以委任敏而趣辦喜從賢士大夫遊家居黃

浦之上築精舍其濱蒔芙蓉映水每花時望之若繡幄
錦城故號東浦因以命子憲讀書其間時往課之觀潮
汐往來乃悟盈虛消息之理故持身淹雅人稱之曰東
浦翁云憲有聲文場遂起鄉科登嘉靖乙未進士丁酉
選授南京禮部祠祭司主事戊戌聖天子推恩詔下竟
以憲官授勅封鷺繡銀章光動閭里人以為此東浦翁
之食報也既而就養南都睇城闕之巍峩覩江山之佳
麗又聞諸當道大人鉅公論議歸益務謙抑儼然儒宗

長者所謂始笑終疑卒乃貼然服矣庚子憲遷儀制郎
中得考一滿便道省公於東浦之上時已徙居浦曲少
南因得寒疾每促憲赴闕曰人臣之義以勤勞見忠吾
老矣尚有厚望焉辛丑憲行行月餘而公卒於家享年
七十有三憲奔歸月餘亦卒人共惜之憲子逢吉煢然
治兩喪並葬而為公乞予銘公子韋布之交而逢吉則
外孫壻也誼不容辭逢吉手自為狀能道家世之詳且
拜且泣曰吾大父性至孝心地坦夷不設城府每當是

非曲直之際則務公言故人多忌之陰中以事構成大
釁破家營救得免嘗歎曰吾受毒踰時則已彼施之者
能久貼席乎且我常受彼常施天之道固昭昭乎昔吾
父之未有子也往禱三茅君歸取家衆斗斛悉毀之曰
我得孫矣已而逢吉生子聞其言皆鑿鑿可誌公蓋不
但食子之報也已今卜以癸卯冬十二月三日葬于楊
塘之陰配吳氏系出清門淑慎善相與公同日受封為
安人子男一即憲娶喬氏息女二長嫁周易早卒次嫁

顧鳴鸞側室高氏出也孫男二長即逢吉娶王氏次迪
吉孫女一嫁陸文煒予仲孫也嗚呼公真儒宗長者哉
宜銘銘曰

澤之長兮江流湯湯風之遠兮其人不亡手所樹藝華
國發祥其肩克昌兮曰此封君之藏

儼山集卷七十

欽定四庫全書

儼山集卷七十一

明 陸深 撰

墓誌銘十

勅贈安人孫氏墓誌銘

故蔡安人既成葬矣始及贈典既成贈矣始克誌之蓋
誠有待也哉於是上海陸深得按武選汪君文盛狀書
之將追而納之玄堂之右誌曰安人姓孫氏封戶部主

事河南商城縣學訓導蔡先生諱貫之配也孫故崇陽
望族居里之橋墩港世修隱德有諱賢者寔生安人安
人始生嶷然殊異氣柔而聲和五歲能讓七歲知戒九
歲精女紅讀孝經小學列女傳都通大義年二十四封
君先生受于孫氏之廟而室之封君出名家少即聰穎
過人蔡處士府君諱英愛之為擇婦必孫氏女既成禮
中外交賀先生方為邑弟子員遭歲惡家遂中落安人
脫簪珥服飾以佐賓祭經史之費罔德色焉封君讀書

安人紡績俱入夜分或至達旦積勤本儉以復家幾中
興焉時處士府君與太夫人鄉居距十里許安人問安
歸無間朝夕得甘旨必先奉處士府君嘗曰相兒子他
日亢吾宗新婦之力也弘治戊午封君先生始循例貢
至京師授職商城安人從之數年縞衣糲食晏如也太
夫人年八十餘留崇陽安人每一思之輒數日不懌歸
省視者至再既沒終具悉出潔鮮不倚辦於妯娌既葬
號慟思慕若不勝焉僉曰孝婦云性澹泊尤不喜飲酒

好周人之急了無後望不欲子姓析居綜理家政老而不倦孤姪祿與玉安人撫之人不知非已出也卒以有立下至臧獲有過必曲為掩覆無喜怒之形以正德十二年十月十日終于正寢壽六十有八明年戊寅二月廿七日葬于青山祖塋之次禮也子男四長曰朝朴茂務農後安人闕年卒次曰翰縣學生次曰乾戶部員外郎僉浙江按察司事季曰榦縣學生息女二長適闕次適闕孫男八孫女五初僉憲乾成進士于京師即

為迎養之謀未數月遽以訃去既禪還朝列職卿省適
今上皇帝入繼大統覃恩宇內亟有褒贈之錫安人孝
敬慈惠之報獲於天者異數已若是矣僉憲文學器識
淵懿明粹雅負經綸之望翰翰諸季俱以經術需次顯
榮方將徵諸人事殆有餘祉焉應法宜銘銘曰

古稱善相獲良惟艱况也宦成從以間關亦有善教思
食其報鸞封鳳章泉壤斯耀運有蚤莫德則不朽惟善
之徵十索而九嗟嗟安人尚有餘慶我銘溪之陵谷為

證

承直郎汀州府通判宜亭劉公墓誌銘

公姓劉氏諱充字復之別號宜亭其先汴人有諱亨叔者始占籍華亭亭叔生仲禮仲禮自華亭遷上海今遂為上海人仲禮生文中世修隱操文中生鈍贈奉政大夫真定府同知公之祖也考諱玉別號靜齋義授散官妣王氏實生公資稟穎拔丰神和雅個儻有大志受易于鄉先生陳晚莊造詣卓然有科第之望屢試不利成

化間以例貢入國監時丘文莊公為祭酒甚嚴於諸生少許可見公文翰加賞拔焉注選還家餘二十年孝友之風動于宗黨癸酉始上天官第入優等授汀州府通判甚有政惠巡按御史張公委以糾巡之職汀故反側郡也公謫姦撫良四境咸安適江西盜起閩廣騷動調浦城兵素稱難制守巡官檄公領之撫馭有方軍民兩便巡按御史胡公深加獎勞自是勞勩遂感嵐瘴猶裹疾視事不怠越歲疾再作乃乞謝政當道者慰留再四

竟不可歸與鄉士夫作晚香之會觴咏為樂者數年以
嘉靖二年癸未二月二日終于正寢上距所生天順戊
寅十月八日得壽六十有六云娶山氏舊家淑德先公
數年卒卜以是歲冬十二月十日丙午葬于方濱祖塋
之右啟山孺人之封祔以側室錢氏而合焉子男二長
兆元績學承家廩膳生娶瞿氏錢氏出次兆先胡氏出
女四談斗曹寶諸弟其壻也一未行公故名家也潤澤
演溢淵源殊矣而明秀豈弟公實有焉筮仕大郡遂克

樹立而引年勇退蹈止足之戒殆今之完人者非耶尤
善筆札工為詩早侍遊宦多聞見之益盃酒談笑綽有
風致不見有廬迫矯拂之態今莫窺其際也初公有母
兄克時從父坦齋先生命為後後坦齋有子而克早世
復歸承大宗焉終身事坦齋父子也坦齋卒服心喪者
三年人尤以此重之深與公累世嬋婭髫髻時辱公為
忘年之交知公為深茲兆元涕泣奉狀以請乃誌而銘
之銘曰

赤劉啟祚代有聞人清門宿望奕葉維新嗟嗟汀州脫
穎絕塵既文既史惟子惟臣才以兼濟壽以成仁萬古
者名百年之身孰是完歸媲美先民先民遺訓惟德有
鄰以昌厥後孫子振振我刻銘詩此石不泯

勅贈文林郎監察御史王公封太孺人齊氏合
葬墓誌銘

公諱振字廷舉年六十有三以正德十三年卒葬大梁
之東郊越十有四年戊子是為嘉靖之七年今上皇帝

大推恩典始以子琇貴勅贈文林郎南京湖廣道監察御史配齊氏封太孺人太孺人受封之六年年七十有三以甲午十月八日考終于正寢時琇以江西按察僉事捧表入朝適還便省得視殯殮人以為異數云卜以明年乙未四月某日葬于邊村崗之東野遷御史公合馬禮也深方為闕輔之後道大梁嘗與僉事同官因往弔焉僉事拜且泣曰昔子贈我也知我有老母在也今吾葬母也而不虞子之遽來也是偶然耶乃揮涕指庭

下所琢石曰必以是為託詰旦具線經造館授狀深慰而諾焉按王之先出下邳世居皮家渡口有諱仁者隱德元世仁生興興從我太祖高皇帝起兵編伍寧國衛太宗入靖永樂間調宣武衛遂家于汴興生順順生通通娶戴氏生丈夫子其仲即御史公也是時同衛人齊能娶王氏實生太孺人年十七歸公公性嚴毅於人不苟合朴直有古風通解文義尤善筆札成化間太監藍忠鎮守汴廉知公乃出令免公事事而事文書焉藍本

靜安公亦樂事之廿餘年無與為比會藍卒而劉琅者
至矣琅貪暴甚公甚憂之託疾求退不得退歸謂齊孺
人曰將不與禍會乎吾且毒吾兩目庶幾脫此孺人止
之曰何自苦乃爾彼左右人可請也公百計通之
果免歸琅敗凡佐琅者俱敗而公迄無他孟兄威早世
遺孤環珮公撫之如己子均其財產使各得所待諸弟
釗賢銳恩義曲至咸有成立云公喜焚修晨起必誦內
典數卷而止夜必辦香祈天無間寒暑初公家甚落孺

人來歸佐以紡績每勸之經營于外而內事一切任之事舅姑飲食必躬致每向公作好語曰吾家世寧終賤貧乎須教諸子讀書為衣冠流時僉事方七歲適在旁孺人撫其頂曰不尚有是兒乎乃延師擇友日日課之既而公寢疾以卒孺人泣謂僉事曰汝父棄汝早以貧遺汝吾恐累汝學當為汝謀使裕由是僉事得一意向學遂以科第起人以為賢母云子男四長玠娶侯氏次瑜娶吳氏次琮娶陳氏三子皆先卒次即琇娶何氏繼

娶李氏孫男八曰紳曰祿曰爵曰化曰中字曰中立曰
中行曰中達孫女二曾孫二惟太孺人始終以道誼相
御史公起家身食僉事之報銘在是銘曰

治世尚文亂尚武革武從文翁與姥誕育季子文中虎
王氏曰昌天所祐兩美並世難縷數始離終合穴吾土
式車奠椒孰敢侮邊村高原高牕牕太史作詩殿萬古
竹溪韓公夫婦合葬墓誌銘

嗚呼是為韓從事竹溪之墓顧孺人虛左合焉蓋臣自

判荆門州奔還哀慕切至治喪如禮以告予曰先人之
葬已成卜矣非舅孰銘孺人予先姑女也故蓋臣謂予
為舅而竹溪視予外兄也嗚呼予尚忍銘吾竹溪耶竹
溪諱恕字希仁少有美質秀偉穎敏學進士業便通已
乃棄去例授浙江都司知印從父雪莊公命也雪莊仕
主景寧簿母談氏韓故上海舊族代多長厚世系具予
所撰雪莊墓誌中竹溪易直簡修和厚醞藉言行皆衷
不屑屑於聲利家遂中落雪莊在景寧幾兩考每歲一

往省行李道萬山中蕭然也雪莊歸談孺人道卒竹溪生
事死葬竭力以濟人稱其孝教子親自課程人稱其嚴
中歲乃闢園圃構亭榭時與賓客徜徉花間當其意興
所到奕碁染翰尤為灑落人稱其逸晚授章服衣冠偉
如雖從事資勞亦復棄去也年六十有二以嘉靖壬寅
五月七日考終于正寢孺人諱愛梅父省軒顧公與今
御醫定芳同母產也而長莊順淑慧夙嫻禮度廣南太
守草堂先生鍾愛之擇壻得竹溪既歸孝敬勤儉為韓

宗倚賴和妯娌睦宗嫺御羣小曲有禮意談孺人卒費
孺人繼之孺人左右奉養必得其心人以為難而竹溪
之孝益光矣初雪莊有弟維死無後雪莊以幼子慈後
之慈於本生欲兼其業竹溪以為法不應爾義可也竟
割產畀之會竹溪有從兄恩亦死無後孺人抱仲子國
以與竹溪曰是不當後乎母煩再割也邑人兩賢之得
年四十有八先竹溪十六年卒寔嘉靖丁亥之九月廿
九日也竹溪感孺人之誼終身不娶以報至是大封焉

禮也子三長蓋臣以太學生授濟南經歷遷荆門州判
淳謹有治材娶潘氏次國太學生出後娶沈氏季俞臣
娶潘氏孫女二孫男二宗道宗周嗚呼予家海上數世
矣與韓顧聯姻蓋臣嘗學於予每侍京邸御醫則同朝
班固骨肉之託也歸將託竹溪以老焉今已矣予又安
忍不銘吾竹溪耶銘曰

生以禮胄配當其偶是曰夫夫婦婦克昌厥後以貽不
朽有眠牛首與載同久

儼山集卷七十一

欽定四庫全書

儼山集卷七十二

明 陸深 撰

墓誌銘十一

勅封孺人錢氏墓誌銘

孺人氏錢封徵仕郎禮科給事中顧公啟明之配前禮
科給事中存仁之母也嘉靖丙申存仁自餘姚令名為
給事中明年丁酉遇推恩大典受勅封孺人戊戌冬天

子舉郊廟大儀存仁疏言五事忤上旨廷杖六十編管
保安州孺人時已屬疾聞之曰兒以身許國邪蒙聖恩
未即死死自其分也庚子存仁歸自保安拜牀下慰勞
悲喜感動遠近孺人疾為少間明年辛丑五月五日竟
卒得年五十有八存仁哀毀幾死躬親歛舍宅卜祠祭
皆如禮又以身是罪人幸乘間踰望天也乃手自為狀
匍匐三百餘里來乞銘有傳陸子浚明所著顧孺人傳
至海上余讀之作而歎曰嗟乎物貴有本也哉夫土膏

沃則木蓄水淵渟則魚字此閼宮玄鳥之所為作也豈
獨神靈之託為然忠貞之成固亦有之漢之范滂晉之
陶侃是已方存仁以言遭譴孺人在牀第間無悶色無
怨詞垂堂之愛若是乎此與范母何以異乃若士雅之
功名本於秣馬截髻此固存仁之後效耳母德所係大
矣顧深不類無能為孺人重重念存仁情事不可以不
書按孺人諱某錢武肅王十七世孫父翥號鶴皋母莊
氏鶴皋七世祖曰謙出贅在崑山生政仕宋為提舉提

舉遷太倉之新安鄉生員元海道千戶員生景春國初徵士景春生瓊以義聞高皇帝錫之衣楮瓊生晉晉生貫貫孺人大父也孺人生有淑質寡言笑端靜而慧事嫡母聞以孝謹稱能通小學女誠大義鶴皋翁鍾愛之年十八歸封給事君迨事實善府君黃孺人暨曾太母楊夫人咸稱之曰錢婦賢實善府君有二幼子一女晚以屬之孺人孺人撫教各底成立其季鍾蚤世無嗣遺命以孺人子為後孺人不可竟立伯兄子田宅頗厚正

德末封君以鄉賦累家遂中落徙居郡城遠二百里甘
髓之奉歲時益勤寶善府君與黃孺人感且泣曰吾安
得死錢婦之手乎後值二喪孺人竭力以佐襄事弟臻
註誤得罪乃晝夜泣為營解之至發疾撫諸子女尤慈愛而
訓飭特嚴平生無妬忌之行多病寡孕育媵妾得男即
為保抱如已出人尤以為難故吳中稱賢母必曰錢孺
人錢孺人云子男三長即存仁娶盛氏繼謝氏次存禮
娶陸氏蚤卒次存性側出娶文氏息女一適州學生龔

愛孫四長可立娶劉氏國子生次可大蚤卒次可貞聘
王氏次可興聘毛氏孫女一卜以又明年癸卯十月二
日葬新安鎮之新阡禮也比孺人之在殯也適鄰火風
颺烈甚柩重而室隘勢無救存仁但泣涕露拜須臾反
風無恙人又以為慈孝之報也母子復完以處死生之
際天將於是乎定矣是宜銘銘曰

勾吳東防溟海汪洋出其潤肪與雲俱長波濤怒狂魚
龍奮揚莫之敢當有葦一航翩然下將弱流湯湯天開

扶桑旭日載陽帆檣斯張利涉奚量珊瑚琳琅鵬鸞
皇光采回翔既泰既康若堂在旁是曰孺人之藏

誥封山西右參議盧公墓誌銘

嘉靖十八年某月日葬盧封君裕齋先生于某原遷王
恭人蘭恭人祔焉先生初封工部虞衡司署員外郎主
事階承德郎加封山西布政司右參議階朝議大夫皆
以子耿麒貴先生既終正寢耿麒自大同鎮奔還襄事
乃奉王大理汝立狀貽書京師託李中舍某來問銘焉

深辱耿麒交且嘗同官不容辭按狀先生諱梁字峻卿永平之樂亭人也盧氏系出山陽自山陽遷定州樂亭則自山陽遷云七世祖溫溫生和甫和甫生從德從德生信信生斌斌生敬敬娶某氏寔生封君敬舉成化乙酉鄉試官刑部司務侃侃不阿以卒于官先生嘗悲其父之未大受也刻意問學并教其子一時俱有聲場屋間而耿麒輒先成進士先生笑曰兒輩偶取捷吾尚未晚也久之以年資貢上禮部又久之會耿麒官滿一考

乃詣京就封因以贈王蘭俱為安人輒復對人嘆曰吾
讀書自少至老未嘗一日怠顧吾豈無自致者今若此
又安能卑卑從人後徼升斗之祿耶適制詞有就封高
矣之褒每捧讀之曰吾有兒吾有兒即吾所以報朝廷
也又何必身親為之哉吾可休矣遂歸與耆舊徜徉泉
石之間以飲酒賦詩為樂先生儀觀甚偉修髯而白晢
如玉有飄飄塵外之氣生平不妄發語與人言盡出肺
腑人有危急即倒囊周之事有不平者毅然見于色若

其人革面亦復謹然處兄弟尤有恩禮長兄槩氣性嚴雖推剉之無怨也弟棐早世先生撫其孤嫠各不失所妹有瞽者且貧待之加一等諸姪中有乏嗣者為置妾而豐其直一鄉之人咸以義稱之以嘉靖己亥二月十八日卒上距所生之戊戌享年六十有二配王氏沂州同知琰之女有賢德相夫教子齊家睦族皆可為世法以正德癸酉正月十有八日卒得年三十有八繼娶蘭氏縣主簿泰之女行實生卒在穆太史伯潛誌中子男

三長即耿麒文學政行為世名流娶郁氏繼娶李氏即
李中舍女次耿麟娶李氏次耿麟娶歐陽氏女三長適
國子生齊宗道次許聘王九韶次尚幼孫男二夢熊夢羆
孫女五嗚呼先生之生當聖世文明之運學成矣竟齋
以沒然承前啟後卒植廬氏為文獻之宗應法宜銘銘
曰

吁嗟先生有文有守欲承于前乃啟其後古稱無憂茲
曰不朽有封若堂珠聯璧偶華袞之褒絲綸孔厚勒詩

貞珉以視瓊玖

顧室華氏墓誌銘

太學生顧大棟汝隆之妻華氏一夕卒於京邸年才二十有四時庚子歲五月朔日汝隆以其賢也悼之甚予適鄰巷而汝隆時時過從問學予往弔焉汝隆泣以返葬告且乞銘予諾焉江南大族稱華顧世相婚姻初海峯君為汝隆擇配聞華女賢曰吾故華甥也使大棟有子華顧其遞好乎遂以禮成聘年十八歸汝隆祖諱祖

知號三山封戶部郎中父木母陸氏聞汝隆言自吾之
有此室也舅姑孝養賓祭恭修吾弟妹訓習僮奴柔帖
顧族稱焉或可以世乎言已則復泣又拭泣指數之曰
是有人未及知而吾獨知者今已矣天乎何奪之速也
昔吾母以氣疾發虛巫醫罔効乃從夜分出中庭拈香
拜天默禱微聞其言曰妾願身代之旬日間果愈某年
例上成均於北乃盡撤奩中裝畀之曰此行入都門當
多購書籍歸為遠大圖丁酉歲將從順天舉鄉試乃移

村落館中日夕攻業以好言相慰曰此一卷書耳離父
母棄妻子何為者光陰幸自愛既而疾作則手書勸之
曰此過苦乃爾保身為上毋貽父母憂也己亥歲卒業北
雍遂攜之往舟淺後至道路惟謹秋抵京邸則念孤客
問疾相勞苦至潸然泣下時從四方士作文會館穀周
至至售手織布以具見作文成帙則喜動顏色若相予
得意者又嘗勸予置側室以蕃孕嗣心感焉而未之遂
許也不久有媵娠乃喜曰吾志也繼之亦娠而禍作焉

是豈天道茫茫者耶言已又泣予聞之曰此天下之賢婦也宜銘女一許嫁浦贊善子某以某年月日葬從祖塋禮也乃為之銘銘曰

雲之慶月有華難為永易興嗟之子歸宜其家水瀰瀰山嵯嵯

奉訓大夫寧海州知州沈君墓誌銘

君諱鉞字建之別號恒齋仕至山東寧海州知州階奉訓大夫致其事年五十有六卒於京第贈禮部尚書沈

公祿之仲子今太常少卿抑之之母弟也母張氏贈夫人壽寧侯綬之女慈壽皇太后之姑也君卒皇太后特遣中官致賻實嘉靖二十年二月十五日其生以成化丙午十二月二十有八日云今卜以五月十一日葬崇文關八里之原從先兆也君幼穎異兒時不為嬉戲長娶鄭氏贈安人故通政使諱表之女今工部左侍郎紳敬菴先生之妹也先三十年卒繼娶潘氏錦衣指揮諱賓之女君無嗣卒之日悉以後事屬少卿君冀善處焉

少卿君奉敬菴狀乞予銘予有鄉里之誼不容辭按狀
沈出松江之上海永樂初有諱良者君之曾祖也隨駕
來京占匠籍今為順天之宛平人良生敬敬生尚書祿
君以尚書蔭為國子生治舉業甚有功試不偶以母命
就選正德丙子授光祿寺掌醢署署正公廉奉職滿九
年陞知寧海寧海山東迤東州也僻處海濱民風刁頑
健訟號難治君蒞任興學校省徭賦補偏救弊而示之
禮義一時民皆向化焉積穀萬餘石癸巳歲大歉君請

于上官發倉啖饑所活甚衆時有歌曰寧海之民太守
生之寧海之水太守飲之太守一去誰其嗣之在寧海
者歷四載屢為撫按守巡旌獎賢聲綽然偶一不合於
當道輒嘆曰此吾歸路也遂解官不一辯白知者高之
君性和厚孝悌藹然至對妻孥如嚴賓遇親舊則情禮
周至居常儉素自持未嘗有疾言遽色人尤以是賢之
病既革乃出所有金帛分散親族雖童僕亦及也君可
謂德誼士哉宜銘銘曰

世胄高門振厥聲出處進退與時行都人士兮東海生
八里之原閼佳城千古萬古垂令名誰其式者視斯銘

司設監太監董公墓誌銘


司設監太監董公以嘉靖十九年二月六日遽卒實以
正德二年十二月十八日生得年三十有五今上皇帝特
憐念之賻恤倍加諭祭之文有曰溫敏之資小心敬慎
蓋公以實行受上知如此故凡同事內廷相與朝夕者
尤哀悼不置弔相之日涕泗連沓蓋公以和氣得人心

如此豈偶然哉內官監太監王公遜與公尤善厚匍匐
過余乞銘其墓予不敢當辭至再而請益勤念予往歲
以翰林編修官奉命教內書堂每見生徒中少年敬謹
者必加禮之且致厚望以為此皆他日聖天子心膺之
寄與吾輩外庭體貌之臣殊蓋君父之心雖出一致而
遠邇勢分終不若親且密者之易於納忠也故今生徒
之柄用者往往不忘予為師範而王公又予之舊館人
也義不容恕乃誌之公諱智字克知別號明齋家世湖

廣武崗州人正德九年秋九月入大內遂選近侍乾清
宮今上龍飛改元嘉靖夏六月選入司禮監從學內書
堂明年春三月復選乾清宮內侍是歲八月遂有牙牌
之賜冬十二月遂陞奉御自是賞賚日繁眷注日隆矣
又明年陞司禮監右監丞五年陞左監丞六年陞右少
監七年陞左少監九年陞太監太監內庭之極選也自
右監丞凡五轉而至皆以歲之八月八日若刻期然蓋
異數云時方年二十五妙齡美質實出倫項又殊遇也

十年十月遂命視事本監十七年又命為宮內牌子牌
子又近侍之極選也十八年命掌司苑局印二月上南
巡承天命掌行在印四月迴鑾仍掌原印於是上將欲
大用之矣自奉御以來凡受賞大紅紵絲麒麟表裏一
斗牛一蟒衣表裏一玉帶一大紅金彩蟒衣紵絲紗羅
表裏者三自十二年以後歲加祿米者八總之為一百
三十有二石又特許內府得乘馬上之禮遇至矣公亦
益奮忠貞以至於歿身為報可不謂生榮死哀也已予

昨扈駕時以翰林院學士掌行在印從彷彿於行朝嘗
目望公今不可作矣以今年某月日葬于阜城門二里
溝之原經理其後事者則太監毛公隆也為之銘銘曰
龍衮日近蟒玉有輝何機柄之伊邇乃淵冰以全歸勇
從順委忠孝一機顧賦形之萬變羌定數以焉違後千
萬年視此銘詩



嚴山集卷七十二